

四庫全書

史部

欽定四庫全書

平定三逆方畧卷二十九

康熙十六年三月戊寅

命督捕理事官麻勒吉招撫孔四貞

時偽監軍道信勝將軍傅宏烈遺侍郎覺羅舒
恕書曰孔王女四貞曾向宏烈言無刻不以

太皇太后為念若降

恩綸赦孫延齡罪封四貞為郡主則可以成事前定藩

兵廢延齡推線國安為帥迫國安死又擁戴其
子成仁今復執成仁隸於四貞一切軍事悉四
貞主之舒恕以

聞

上諭兵部抄錄侍郎舒恕等奏疏并傳宏烈移文發麻
勒吉俾招撫孔四貞仍令大學士撰勅與麻勒吉先
令錄示四貞如果有意投誠再行頒勅

已邠大將軍康親王傑書奏官兵復泉州

海賊偽將軍何祐等自興化敗遁復糾賊三萬
餘固守泉州鄭錦又遣偽總統王進功率賊三
千協守將軍拉哈達等率滿漢官兵進攻二月
初九日拔其城逆賊潰遁我兵乘勝追勦多所
斬獲

庚辰大將軍康親王傑書奏官兵復漳州

時海賊鄭錦大敗于興化泉州遂爾喪膽棄漳
州海澄而遁海澄偽副將孫紹芳漳州偽知府

程夢簡等相繼於軍前納款將軍拉哈達等統率大兵于二月二十日抵漳州遂復府城及海澄等十縣閩地悉平傑書奏至

上降諭嘉之曰王統率官兵自衢州入仙霞關直抵福州勦撫並用所向克捷擊逐海賊收復全閩安輯百姓克奏膚功深為可嘉有功人員著議叙具奏

甲申

命大將軍康親王傑書分兵進潮州以署副都統莽依

圖為鎮南將軍帥師進廣東

上諭議政王等曰今閩地悉定大將軍安親王圍困長沙已久將軍穆占復帥師進勦將軍鄂鼐統兵水陸赴岳殲滅吳逆蕩平諸寇在此一舉康親王宜及兵威大振之時分遣官兵同耿精忠兵進取潮州其進勦留守機宜速議以聞又大兵分路進擊逆賊不暇窺贛其授署副都統莽依圖為鎮南將軍精簡士馬夾攻廣東以副都統額赫訥署副都統穆成額叅贊

軍務令侍郎舒恕量留甲兵同巡撫修國禎總兵官
哲勒肯鎮守贛州諸處至江西建昌諸處大兵俱已
撤赴吉安簡親王軍士卒甚衆酌撥每佐領三人合
在贛大兵令莽依圖共選每佐領六七人俟康親王
所議俞旨到贛即率之前進尋尚之信傳宏烈密疏
納款劉進忠苗之秀各報投誠遂以之信等原
疏抄發傑書令將軍拉哈達及耿精忠等速進
廣東未幾傑書奏福建既平即欲親統大兵入

粵但省會重地未可輕離且自福至漳相距甚
遠兵馬到彼必須休息恐遲至炎暑難以進師
今漳汀見兵密邇粵境宜選將士有馬者令將
軍拉哈達都統賴塔等率之同耿精忠先赴潮
州後當繼遣官兵接應

上報可復

諭議政王等曰康親王大兵平閩人馬疲敝難以深入
粵地令酌分官兵前赴潮州若劉進忠等迎降暫駐

彼地即移檄令尚之信知之仍趣莽依圖兵速進廣東

臣謹按大兵初進閩中尚之信等皆聞風震
警已有歸順之意然吳逆黨醜在粵者尚多
猶不免兩端觀望至是

皇上以海賊敗逃閩中底定且大兵分道進勦湖南逆
賊無暇窺贛州諸郡儻不乘機取粵恐賊兵
漸增據守要害則粵東既難猝下而心欲歸

降者或亦因之中沮乃

命傑書遣兵赴潮莽依圖帥師入粵于是軍威大振賊
勢羣摧之信等遂率衆來投劉進忠等亦窮
迫歸順而粵東郡縣以次收復矣是皆

睿算昭灼知已知彼應機趨利無少遲疑之所致也

申飭諸將詳核官軍功罪

兵部奏侍郎班迪等咨稱吉安兵士罪狀向無
供詞今始訊問必須時日

上諭前原任將軍赫業瓦爾喀等于蟠龍山為賊衝營
一案並未審明口供確驗地方造具清冊異圖朦瀝
今大將軍簡親王喇布等又將吉安軍情不行嚴審
取供殊屬不合我國家從來軍法嚴明並無苟且急
玩之例嗣後各將軍應察明官軍功罪確驗地方取
供造冊以俟稽核若仍蹈襲故轍將統兵將軍等俟
事平日嚴加議罪

甲午

命送馬長沙軍前

上諭兵部今福建江西陝西俱已底定而諸將又分路
進取湖南宜協助馬匹以資大兵王貝勒以下文武
各官可酌量捐馬并撥內廐馬一千送赴長沙軍前
每旗選賢能官二員令太僕寺卿溫岱統之以行溫
岱等過南昌即啓聞大將軍安親王酌撥官兵于袁
州萍鄉醴陵諸要地迎接沿途務保萬全溫岱等直
抵長沙交明始回

乙未

諭尚之信等速迎大兵

時尚之信傳宏烈各遣人密疏請兵

上諭大將軍安親王圍困長沙已久將軍穆占復進定
湖南將軍鄂鼐又赴岳州水陸夾攻逆賊吳三桂無
暇窺粵且大將軍康親王令將軍拉哈達等統兵下
潮州將軍莽依圖等亦率兵入粵之信宏烈等各率
所部速迎王師協勦兇逆

赦劉進忠等罪

時原任潮州總兵官劉進忠碣石總兵官苗之秀遣人投誠大將軍康親王傑書以

聞

上命宥進忠之秀及標下官兵罪仍以進忠為潮州總兵官之秀為碣石總兵官隨大兵進勦尋授進忠征逆將軍

己亥

命總督董衛國領兵勦賊

衛國奏楊玉泰等孽盤踞宜黃樂安崇仁山谷
中荼毒生民慘惡殊甚若不早為除剪勢必燎
原臣請親統標兵前往撲滅

上可之未幾衛國偕副都統尼滿提督趙賴總兵官許
貞等率兵分勦敗賊於大嶺遂復樂安玉泰窮
蹙率衆來降

壬寅

命大將軍簡親王喇布戴罪圖功革參贊哈爾噶齊等

職隨軍自効

時侍郎班迪等還自吉安以所察軍罪奏

聞

上諭大將軍簡親王喇布自至江西初無勞績圍困吉

安日久不下賊遁又不能邀擊其令戴罪圖功參贊

哈爾噶齊巴爾堪等營壘失守情罪重大俱革職披

甲自効副將軍希爾根年老衰憊其撤回南昌暫駐

將軍額楚臨陣指揮不舉發首遁者明係身先敗遁
欲自掩已罪也其削去將軍叅贊姑留世職仍統江
寧官兵戴罪圖功見在吉安叅贊大臣均不勝任其
以都統勒貝護軍統領哈克三副都統布舒庫前往
為參贊大臣更選八旗護軍參領及各王府長史共
八員一同遣發為夸蘭大彼處所餘夸蘭大盡行汰
去又吉安礮手俱未諳練每翼精選礮手二人發往
軍前班迪等所訊軍狀姑俟事平再議

癸卯

詔察殉難官員骸骨并妻子資送歸里

上諭吏戶兵三部自吳三桂煽亂以來用兵地方文武
官員或矢志固守勢窮莫支盡節封疆或身陷賊中
堅貞不屈橫被慘害或從容就義合家殉難視死如
歸此皆為國捐軀克全忠節深為可憫其有骸骨未
能歸葬妻子尚寄遠方孤苦無依更堪軫惻宜加恩
卹以慰忠魂其令各督撫察明凡殉難文武大小官

員骸骨并其妻子俱准動正項錢糧資送歸里以昭
朕優卹忠節至意

臣謹按人臣服官受祿處無事之時則殫心
職守遇有事之日則為國捐軀此乃古今之
定義天地之常經也當吳三桂煽亂以來守
土官弁感

國家養之恩忘身殉義情雖可憫要皆分誼當然
皇上乃于卹典之外復命督撫察明收其遺骸資送其

妻子歸里是誠

皇上勸忠之至意破格之殊恩凡為臣子者可不益思

報稱也哉

乙巳

命運紅衣礮赴長沙

大將軍安親王岳樂等奏臣軍中礮既皆小且
復無多乞將吉安荊州或西安大礮運至長沙
以便攻城疏入下議政王貝勒大臣集議議政

王等議曰方今時勢攻取長沙勦滅湖南逆賊
最為要務宜撥新鑄大紅衣礮二十具令兵工
二部官各一員驛送南昌至袁州令總督董衛
國撥兵護送由袁州至長沙未設驛站令董衛
國動支正項銀兩多僱夫役以備轉運俟溫代
至袁州即管領此礮與安親王所遣迎馬官兵
偕行其送礮官員即令來還

上諭解送馬礮關係重大將軍穆占其親統官兵赴袁

迎接儻未便親往可選同去大臣一員前來接應直達長沙勿致疎虞

命大將軍順承郡王勒爾錦勒兵臨江大將軍公圖海勒兵逼漢中

先是

上諭據荊州坐塘筆帖式報賊犯遼安旋復退回逆賊或因我兵進取長岳虛聲牽制亦未可知大將軍順承郡王勒爾錦等應作進兵之勢揚言渡江以疑賊

兵至是大將軍安親王岳樂等奏逆賊吳三桂糾聚
賊衆死守長沙

上復令勒爾錦速勒兵臨江更令圖海整飭陝西滿漢
官兵進扼漢中要路移檄聲言進兵以分賊勢
儻機有可乘即行進剿

丙午總督董衛國奏官兵復吉安

大兵圍困吉安日久賊糧匱勢蹙于是月二十
一日夜出南門趨舟東竄我兵遂入城

詔責大將軍貝勒尚善等

先是尚善等報二月二十六日撥滿洲蒙古綠

旗兵一千餘人由岳州送馬三千餘匹赴長沙

上諭大兵需馬甚殷非尋常比貝勒尚善等去賊甚近
必審知萬無一失方行遣送然長岳之間路未甚通
若逆賊阻截護兵力單難保無虞宜預約安親王遣
兵相迎度兵且來然後發往且將軍鄂鼎率兵赴岳
尚善所知或俟此兵到後更多添兵力俾無他慮方

可遣行今但以千兵護送如許衆馬殊為輕忽倘事
出意外既於我不利且為賊資則是尚善明悞征勦
大事尚善其速偵送馬消息以聞尋尚善等報官兵
解馬於本月初八日抵七星臺遇賊伏兵為所
邀奪

上命尚善等明白回奏尚善等引罪

上切責之曰尚善等統兵赴岳已歷三載糜餉勞師未
獲寸土今又將送往安親王軍前馬匹冒險遣發且

以少兵護行致中途被奪終為賊利貽悞大兵急需
情罪匪輕宜即從重處分念其見在征勦姑俟事平
察議未幾大將軍安親王岳樂以遣兵迎馬緩致中
塗被刦奪亦具疏引罪

上復切責之曰勦滅逆賊惟馬是賴貝勒尚善等遺書
預約三月初二日馬到長洛河而岳樂故失期約不
遣兵往迎目覩戰馬數千盡為賊有大喪軍資情罪
甚大事平之日從重議罪

臣謹按長沙軍前戰馬缺少

皇上念大兵急需所關至鉅命撥三千餘匹由岳州送

長沙復

諭令尚善多遣官兵護行岳樂分發士卒迎取

廟畧指授備極周詳乃尚善僅撥千人付之羣馬令赴

長沙報至之日

皇上即預料中途必當有失隨降

諭尚善深以輕忽為咎尋果因將護力單來迎兵緩致

所遣之馬為賊邀奪

皇上熟悉道里之可危早見事勢之必至

睿謨深慮抑何明且遠耶

命將軍莽依圖帥師速赴韶州額楚帥師速赴袁州

時吉安既復尚之信又請迅發大兵

上諭大將軍簡親王等將王府佐領下兵及大兵內選
有馬者每佐領三人速發贛州此兵到日將軍莽依
圖等即選足每佐領七人速赴韶州仍與尚之信相

聞令立圖內應袁州乃安親王大兵後路其以滿兵
每佐領四人以上及自安慶發往綠旗兵一千並付
額楚俾赴袁州屯駐為安親王後繼前所送馬礮到
袁州付與來迎官兵額楚仍添兵護至長沙至吉安
親復簡親王可偕多諾統每佐領兵三人及自安慶
發往綠旗兵五百人併城守官兵駐鎮吉安更撥每
佐領兵一人添發贛州令侍郎舒恕統領防守其餘
缺少馬械之兵并綠旗官兵付副將軍希爾根提督

趙賴令回南昌整繕候調簡親王同理事官麻勒吉
酌遣幹辦人員齎諭招撫原任貴州提督李本深巡
撫曹申吉廣西提督馬雄將軍孫延齡等

平定三逆方畧卷二十九

欽定四庫全書

平定三逆方畧卷三十

康熙十六年四月庚戌削江寧副都統綽克托職
時綽克托隨征廣東託言疾病白平南親王尚
可喜遂還江寧

上諭議政王等我朝用兵以來凡出征大臣無不奮力
行間以終其事從未有軍事未竣半途而還者今廣
東多事之秋綽克托借稱有疾竟還江寧顯屬規避

其草職披甲發往將軍莽依圖軍前

辛亥

命步軍總尉薩克察巴圖魯署前鋒統領赴吉安

上諭兵部吉安諸處兵為數甚衆既遣參贊大臣宜更
擇賢能為前鋒統領步軍總尉薩克察巴圖魯善哨
探習戰陣可署前鋒統領赴吉安參贊軍務左翼遣
前鋒護衛噶爾麻右翼遣前鋒參領馬席泰同往

戊午

敕大將軍簡親王喇布等撥給將軍莽依圖軍

時莽依圖奏入粵士卒無馬者衆

上命喇布及總督董衛國撥江西滿漢官兵馬二千匹
送莽依圖軍前自京師發往長沙馬四千餘匹
抵南昌日太僕寺卿溫岱撥二千以補江西馬
額已而喇布奏將軍莽依圖等於本月二十四
日已統兵赴粵天暑道遠送馬恐難驟至

上命喇布等仍選江西官兵馬一千速送贛州付侍郎

舒恕等轉送莽依圖軍前并

詔責喇布曰喇布明知進粵大兵所關甚要不即遵旨
遣送馬匹竟使大兵徒步前進殊忝大將之職宜即
議處以見在用兵俟事平旋師之日嚴加治罪

趣大將軍公圖海進兵四川

圖海奏言臣令駐防秦州寶鷄官兵進逼禮縣
驛門諸處隨移檄聲言大兵分路進勦今欲親
統重兵深臨入川之路第恐去而即還則軍行

無益若久留駐則又坐老我師且時多霖雨輸
輓艱難當俟機會酌量前進

上諭今將軍穆占協勦長沙貝勒尚善與將軍鄂鼐水
陸攻岳故逆賊吳三桂親赴長沙集諸路賊兵死守
湖南我兵若乘此機各路進勦則吳逆指日可滅計
在陝官兵為數甚多當此逆賊勢分之時若不進逼
四川則坐糜糧餉殄賊無期大將軍公圖海其仍遵
前旨速行進發

命大將軍簡親王喇布檄諭原任提督嚴自明

時自明遺書總督董衛國乞降衛國以

聞

上諭今將軍拉哈達莽依圖等兵兩路進粵嚴自明若
悔罪反正來迎王師當赦其罪仍前錄用簡親王喇
布其即遣檄諭令知悉

庚午

命大將軍簡親王喇布等防守贛州諸處

大將軍貝勒尚善等報逆賊吳三桂率賊衆往
衡州

上諭我兵攻圍長沙賊以窮蹙欲從衡州侵犯贛州吉
安諸處以分我兵勢亦未可料其令簡親王喇布侍
郎舒恕總督董衛國總兵官哲爾肯等分布防禦偵
賊情形不時奏聞

辛未申飭大將軍簡親王喇布等

先是喇布遣學士王啓元等奏復吉安情形

上諭喇布等統領重兵圍吉安一城日久不下虛糜國帑徒勞士馬被困之賊不能撲滅故使逸出逸賊率皆步行復不能追擊聽賊渠脫逃情罪重大宜即處分念見在進兵俟事平旋師之日嚴加治罪又王啓元奏稱吉安雖復賊皆逃出與土寇合勢江西未為全定前因總督董衛國疏稱吉安已復逸出之賊見在圍剿故令酌量分遣大兵赴袁州南昌今江西既未全定可令參贊大臣到日相視地方輕重緩急如

不能如前旨分遣則聽其便宜調度至螺子山拒賊一案與縱賊逸出官兵其嚴察罪狀以聞至是啟元

還吉安

上復令傳諭喇布及諸將軍等曰諸路大兵俱各殫力殺賊惟江西一路屢屢朕憂爾等圍困吉安既已踰年乃縱賊盡令逸出又不恤人民肆行侵掠夫國賦出於民有一民則有一民之賦若不撫輯招徠地方何由底定又屢稱江西兵士戰馬羸瘦多斃爾等頓

兵江西未出四五百里外戰馬何由羸斃况康親王
兵由浙江定福建入廣東彼馬何獨能進豈非爾等
憚入楚粵預為託故乎嗣今宜竭力辦賊平定疆土
勉建功績用贖前愆

乙亥削佛尼勒將軍等官

上諭議政王等西安將軍佛尼勒出征四川保寧虧損
官兵貽誤大事可罷其將軍革去世職惟留所襲伊
父拜他喇布勒哈番令署西安將軍事

五月癸未郎中色度等報舟師入湖

時岳州舟師器械已具惟俟風信是月初三日
會風利將軍鄂鼐隨率大兵以戰艦二百餘艘
直越賊船進取君山我兵既逼君山與賊連戰
數日不能破遂引軍還

乙酉

命傅宏烈為廣西巡撫

時宏烈遺理事官麻勒吉書稱廣東震動若大

兵速進南安宏烈從中接應前赴韶州以扼廣
東咽喉則兩廣可計日而定廣東路通則廣西
全省宏烈便可一面當之但須假一虛銜方可
行事并標下官員各照原銜換給印劄庶可鼓
勵人心麻勒吉以

聞

上諭傅宏烈圖報國恩忠誠懋著可優陞為廣西巡撫
今將軍莽依圖等大兵已進廣東俟宏烈迎見軍前

即與勅印其標下官員亦令大將軍簡親王給以印
劄

壬辰將軍莽依圖奏復南安諸府

四月二十九日莽依圖軍抵南安原任提督嚴
自明以城降逆賊郭義等率其衆遁走於是我
兵進發沿途屢敗賊寇克取南雄直抵韶州偽
文武官俱繳印劄投誠偽監軍道信勝將軍傅
宏烈迎大兵於始興

辛丑

詔粵東軍機許將軍莽依圖直行奏報

上諭兵部莽依圖既授為鎮南將軍平定廣東一切機
宜宜聽直行奏報若由江西大將軍王及侍郎舒恕
等轉達似屬非宜且耽延時日嗣今凡軍機賊情地
方形勢莽依圖其徑行奏報

乙巳

命留紅衣礮於南昌以銀及馬送長沙


先是

上諭兵部前安親王岳樂等疏請紅衣礮隨已發往今聞袁州至長沙道路險阻運礮夫役既多為費實繁若礮一到即得長沙則送往固宜儻難猝拔則送亦何益念安親王兵久入湖南馬多致斃已自京撥馬陸續發往今將軍穆占率精兵會勸猶未克取長沙與賊對壘如故我兵甚衆芻秣無多即馬到長沙勢必坐致疲瘦不堪驅策可令馬匹暫停袁州紅衣礮

暫留南昌溫岱先赴安親王岳樂將軍穆占等軍前
詳議以聞安親王所統軍士雖曾給賞為時已久應
撥正項再行頒賜總督董衛國無論何項錢糧撥二
十萬兩解赴袁州俟溫岱自長沙回日酌量轉解至
是溫岱奏曰臣詢安親王岳樂將軍穆占等皆
云紅衣礮即到亦未必能遂破長沙芻秣誠少
而軍士缺馬甚多應否解送恭候

睿裁

上乃命留紅衣礮於南昌仍令溫岱解銀馬赴安親王
岳樂將軍穆占軍前



平定三逆方畧卷三十

欽定四庫全書

史部

平定三逆方畧卷三十一至五

詳校官編修_臣曹振鏞

編修_臣裴謙履勛

總校官候補中書_臣潘有為

校對官中書_臣李斯咏

謄錄監生_臣邵延曾

欽定四庫全書

平定三逆方略卷三十一

康熙十六年六月戊申尚之信奏率兵民歸順

之信奏臣聞將軍齊依圖兵抵韶州即於五月

初四日率省城文武官及兵民薙髮歸順復遣

署都統尚之瑛等代臣赴韶迎接王師

上命之信襲其父可喜平南親王爵

原任兩廣總督金光祖奏率兵民歸順

金史卷一百一十五
光祖奏臣標舊兵遵臣密諭於四月初二日斬
首叛副將雷孚言擒繫偽總督董重民等臣於
二十日抵肇慶聞王師進粵隨曉諭兵民薙髮
歸順

上諭尚之信金光祖等即將偽總督董重民及所執偽
官品大者俱不聽薙髮委官兵護解來京沿途將軍
督撫提鎮亦添兵傳送毋致疎虞

壬子

諭大將軍康親王傑書備劉進忠

上諭兵部據尚之信奏劉進忠以康親王招撫文檄潛
送吳逆召兵自救足知進忠心懷詭譎非實意歸誠
其檄康親王密為之備

命江寧巡撫慕天顏督造烏船

大將軍貝勒尚善等奏言得烏船四十艘即可
破賊

上乃命慕天顏如數速造以資大兵之用尋慕天顏上

言所造烏船甚多必須時日臣躬自督工期以
六閱月告竣

上諭岳州需船甚急若六閱月始竣則秋冬已過有誤
破賊之期慕天顏其晝夜并力務於八月內竣工遣
往岳州

丙辰以馮甦為廣東巡撫

時尚之信奏偽巡撫馮甦不忘

國恩協謀歸順

上因授馮甦為廣東巡撫已而巡撫傅宏烈又奏馮甦
為逆賊吳三桂顧待甚厚且其家屬俱在雲南
今茲投誠乃出於窮迫請安插內地以絕其暗
通聲息

上遂補馮甦為刑部侍郎令其來京

命侍郎覺羅舒恕為安南將軍

上諭議政王等曰侍郎覺羅舒恕既駐贛州統轄滿漢
兵防守地方不可無印副都統楊鳳翔所留安南將

軍印見在平寇將軍華善所其令華善遣的當人員
齎印速赴江西付總督董衛國轉送舒恕

丁巳尚之信奏祖澤清降

之信歸順後即傳檄粵境原任高雷總兵官祖
澤清遂率所屬官兵於五月十九日薙髮投誠
高雷廉三郡悉定

命大將軍簡親王喇布調兵守江西省城

總督董衛國奏據在省官員報湖廣平江及銅

鼓營逆賊聲言出犯甚急臣已留提督趙賴兵

守樂安而身還省城遣兵赴勦適簡親王復調

臣標兵前往樂安臣即啟覆簡親王簡親王遂責臣以輕王慢

旨既奉嚴諭何敢有違隨撤進勦銅鼓之兵發往樂安

但省城乃楚粵後路最屬緊要留省滿兵止二

百餘又無綠旗官兵萬一有警恐難禦遏致負

皇上任使乞賜罷斥另簡賢能以副總督重寄

上乃切責喇布曰前屢詔喇布進勦吉安屢以省會重
地不便輕離為辭今既赴吉安省會何遂可緩耶省
城官兵盡調遠地輕率已甚且以輕王慢旨之語恐
赫調兵尤屬不合喇布等其速撤可緩地方官兵鎮
守省城務使無虞嗣後調度綠旗官兵皆與總督董
衛國會商行之衛國亦照舊供職

己未

諭將軍莽依圖用兵機宜

時翰林院侍講學士顧八代赴莽依圖軍前

上令傳諭莽依圖曰用兵利在神速毋稽遲貽誤或不得已擇便而進者有之凡此機宜爾自熟悉近以逗留誤事如長沙荊州諸處其明驗也

命調提督嚴自明赴廣州

時尚之信奏提督嚴自明係吳逆舊屬不知軍旅今粵東初復兵心甫定若以控馭無術形迹可疑之人復令統轄恐兵民不安

上諭兵部據尚之信來奏宜撤嚴自明還京師但撤還
自明恐將來投誠者皆懷疑不前其優加自明為將
軍調赴廣州閒住已而自明奏言臣既掛彈章宜避
嫌疑乞賜撤還或安置畿輔或隨侍

輦轂

上乃命自明俟新提督到日即還京師

辛酉

諭諸將帥招撫陷賊官吏軍民

上諭各省王貝勒大將軍將軍總督巡撫提督等逆賊
吳三桂背恩倡亂散布偽劄誘惑兵民迫脅官吏以
致生民塗炭所在騷然今各路大兵勦撫並行平涼
福建廣東諸處相繼平定文武大小官員兵民人等
俱被恩賞安插得所惟湖南四川雲南貴州官員兵
民人等仍陷賊中未得歸順念此等俱受國恩必非
甘心從賊蓋有懷忠義之心而無脫身之路者亦有
身被迫脅懼罪疑畏者今大兵雲集不日蕩平賊寇

玉石難分朕心深為不忍特頒敕諭概示招徠凡在賊中文武兵民人等悔罪歸順前事悉赦不問如常加恩或有擒殺賊首投獻軍前及以城池兵馬來歸者仍論功優敘爾等即宣布曉諭以副朕寬仁矜全之意

庚午

命大將軍康親王傑書調劉進忠等駐福州以都統賴

塔守潮州

上諭傑書曰據筆帖式塔穆哈圖報潮州劉進忠已於
本月初六日薙髮投誠今進忠復遺書吳三桂為平
南親王尚之信舉發是進忠投誠本非真心不過勢
窮就撫耳又總兵官劉炎所遺吳三桂書亦皆搜獲
其心迹與進忠畧同此等皆心懷反側久留潮州必
致生變若果已投誠康熙親王等即託言欲與相見以
計撤回留駐福州設或遲疑不至速行奏聞進忠等
既撤則令將軍拉哈達以兵之半守漳泉都統賴塔

率其半守潮州仍令尚之信遣原任潮州總兵官王國棟盡率其標兵詣賴塔協守

臣謹按劉進忠等皆係反側奸徒其投誠也不過因我兵進逼潮州尚之信等又以廣城歸窮蹙無歸乃俯首來降本非真心効順者也故前此既報投誠潛以招撫檄文送三桂所乞兵自救時

皇上已洞見其詐

命傑書密加防範至是雖經薙髮復遺書三桂為尚之
信舉發

皇上慮其有變又

命傑書以計撤還福州彼時進忠等雖不得已而往而
中懷叵測究未革心後果與耿精忠等謀為
不軌賴大兵有備狡謀莫逞不然則久留潮
州倉猝變起必又煩王師之撲勦矣要惟

皇上明如日月無隱不燭所以能弭亂於幾先也

壬申免陝西平涼慶陽田租

上諭戶部平涼諸處遭逆賊變亂已閱二載田土荒蕪
民不得耕其租稅量子豁免令總督巡撫曉諭小民
務使得沾實惠

癸酉

命將軍莽依圖速還韶州

將軍覺羅舒恕等奏將軍莽依圖遺臣書云我
等駐韶州候

旨調遣因尚之信屢遣人來言劉進忠等尚未薙髮遂
留副都統穆成額駐守韶州而身偕將軍額赫
訥於本月十一日領率官兵前赴廣州

上諭前議令簡親王大兵俟粵東既定即進取衡州將
軍莽依圖兵俟馬到即進取湖南平南親王尚之信
等進取廣西令劉進忠等已薙髮投誠潮惠無虞莽
依圖其速回韶州同各路大兵分道進剿

甲戌

命鑾儀衛鑾儀使王可臣為廣東提督

時授廣東提督嚴自明為將軍故以可臣代之

七月丁丑革原任兩廣總督金光祖職戴罪圖功

光祖奏臣前窺察衆情多有猜疑隨將臣總督

兩廣關防暫行秘藏託言失去今雖用原藏關

防為信綏輯人心然受兩粵重寄不能預籌保

固一旦被陷貽誤封疆臣罪難逭

上諭金光祖身膺兩粵總督重任不能保守封疆致地

方陷賊前奏關防已失今又稱收藏如果曾收藏其
具題失印之時何不以此情密奏觀此明屬巧飾本
應革職從重治罪念其與平南親王尚之信密謀反
正復定粵中著革職仍留原任戴罪圖功

丁亥

命大將軍簡親王喇布曉諭韓大任等

喇布奏言聞吉安逸賊韓大任等屯寧都樂安
諸處臣隨調滿漢官兵三路追勦仍行文招撫

今大任等意欲投誠啟請轉奏

上諭前王輔臣等投誠俱已免罪復用近又特詔傳諭
被脅從賊官吏自拔來歸赦罪議敘簡親王即以此
意曉諭大任等具兵部印文一併發往

辛卯

命尚之信等援韶州

大將軍簡親王喇布等奏偵得吳三桂所屬偽
將軍七人率賊三萬至宜章欲犯樂昌又欲分

兵犯南安

上諭逆賊至宜章屯駐復欲分兵南安勢必窺伺南韶
簡親王宜預為守禦之策以固疆圉又潮州劉進忠
劉炎等俱已薙髮歸誠粵省官兵無東顧之憂平南
親王尚之信將軍莽依圖即親統滿漢官兵赴韶協
勦湖南逆賊將軍舒恕領兵防守南安南雄諸處為
韶州聲援或未便身離贛州亦當量遣官兵馳赴尋
舒恕奏據副都統穆成額報逆賊于本月初五

日圍攻韶州甚急臣即與巡撫佟國禎總兵官哲勒肯等會商遣署副都統赫勒布率滿漢官兵赴援

上復諭韶州江粵咽喉必爭之地尚之信莽依圖等以文到日即率兵速赴韶州舒恕亦相機應援簡親王仍分兵赴贛以資防禦

臣謹按韶州江粵咽喉又接楚南之境

皇上知其地居形要賊所必爭早已令官兵汛守嚴加

備禦至是吳逆因尚之信歸順我兵復規取
廣西心懷惶懼遂大糾賊衆蒙死攻韶意在
遏我後路侵我廣東

皇上復慮韶州脫或有失則廣東不無可虞乃亟調諸
將星馳赴援於是我兵併力內外夾擊逆賊
大敗隨棄營遁去粵疆得安皆由防範周密
調遣神速故能保韶郡要害之地深挫賊鋒
使逆寇不敢復窺東粵也

丁酉

命加祖澤清都督同知仍管總兵官事

原任高雷總兵官祖澤清奏罪

臣

束兵無術臨

難偷生蓄恨兩年始得乘機斬賊率屬歸順有

罪無功奚敢置喙

臣

謹束身伏鎖靜聽處分

上諭祖澤清先雖被脅從逆仍感戴國恩密謀斬倡亂
逆弁陳加正擒偽將軍謝厥扶等薙髮歸順其加都
督同知仍管總兵官事

命將軍穆占以師會大將軍簡親王喇布進定衡永諸

郡

先是大將軍安親王岳樂等奏大兵乏糧樵採
至二三百里外

上乃命穆占速行分道進剿湖南其進兵機宜仍行奏
聞至是岳樂等復奏臣等兩軍并駐日久求糧芻益

艱宜分兵往岳州水路夾攻今臣等共議令將
軍穆占與其所偕大臣及前鋒二百護軍每佐

領三人驍騎每佐領三人蒙古兵五百漢軍一百五十綠旗兵三千前往岳州臣軍惟留穆占所部護軍每佐領一人驍騎三人并援勦營兵三千人礮五十

上諭大將軍貝勒尚善等前奏須得烏船始可破賊已命巡撫慕天顏督造今即將軍穆占統兵到岳亦必俟烏船告竣然後進攻度烏船到彼正當隆冬水涸難以前進若俟明年水長進兵勢必坐守岳州虛糜

日月穆占宜勿赴岳州以兵會簡親王規取衡永諸處遏賊後路如此則粵東得以寬緩而粵西欲降者亦可乘間來歸穆占等其即率赴岳官兵速趨茶陵攸縣與簡親王兵合協力進取衡永諸處命巡撫傅宏烈為撫蠻滅寇將軍

宏烈奏臣前請大兵接應力任進取兩廣今廣東全省已定廣西乃臣專責無可他諉臣與將軍莽依圖等議欲進取廣西緣

敕印未至無以為信且臣兵寡弱必得尚之信官兵同

臣進取庶克有濟又收復廣西雲貴須招集土

司土司官員專取憑於印信若以廣西雲南各

土司印信頒發招撫一處即給一新印以杜反

覆則逆賊可不煩大兵而滅矣臣標官兵經年

缺餉兼少馬匹請量撥給以資進剿

上諭覽奏詞意忠懇傳宏烈可仍以廣西巡撫為撫蠻

滅寇將軍給以勅印令尚之信速遣所屬官員與傳

宏烈同定廣西土司印信禮部鑄給其官兵錢糧令
總督金光祖給銀十萬兩俟秋涼再發馬匹尋又
命戶部撥銀十萬兩解赴宏烈軍前

庚子尚之信奏復惠州

時海賊劉國軒竊踞惠州聞尚之信劉進忠等
歸順大兵將至於六月初十日棄城潛遁偽總
兵陳璉等以城降

辛丑

命大將軍簡親王喇布等調遣官兵固守袁州萍鄉

喇布奏吉安贛州南安皆重地臣等兵力甚單

議撤駐袁兵每佐領三人并撤統領江寧兵額

楚署副都統楊古岱等還吉安以備調遣其袁

州萍鄉諸處乞令安親王分兵防守

上諭安親王及將軍穆占之兵不便分遣袁州萍鄉係

安親王大兵後路簡親王仍量調通省官兵嚴加防

守

甲辰尚之信奏瓊州官民歸順

原任瓊州總兵官佟國卿等聞尚之信歸順隨
於五月二十九日率兵民雜髮輸誠粵東悉定

平定三逆方畧卷三十一

欽定四庫全書

平定三逆方畧卷三十二

康熙十六年八月丁未

命遣猺猺總兵官陸道清還雲南

大將軍安親王岳樂等奏猺猺總兵官陸道清
請還雲南從中舉事相機鼓動土司可否發往
伏候

睿裁

上命遣陸道清回雲南宣布寬大德意曉諭土司倘未
便舉事亦聽其還鄉使彼父母妻子得以完聚其布
政使周昌黃九疇仍留安親王所俟有機會題明遣
往招撫

命總督董衛國領兵勦逆朱統錫

衛國奏逆賊朱統錫復犯江右已破貴溪瀘溪

諸縣臣請親率所部官兵前往撲勦

上命衛國便宜進勦

命備養馬匹于南昌諸處

上諭議政王等曰外藩蒙古王等捐馬甚多江西鄰近湖廣廣東乃適中之地可撥五千匹發往南昌令總督董衛國遴委賢能官員督視秣養後又

命簡選兵部喂養馬及營驛馬二千匹發往湖廣武昌飼秣備用

臣謹按馬匹為大兵急需所關綦重時禁徂征已歷數載

皇上慮軍行日久戰馬不無疲損若進勦逆寇或有缺
乏則江楚諸省素非產馬之區一時不能驟
得從京師發往道里遙遠必致有悞事機故
前此屢

諭兵部解馬軍前至是復令撥馬于南昌武昌豫為備
養以待不時之用其後大兵尅定湖南分路
前進即以此馬分給士卒故征討所至甚得
其力蓋由

皇上先事區畫戎備充周所以王師規取滇南無少稽滯也

乙卯

命誅逆賊謝厥扶等

尚之信奏祖澤清以所執偽順德水師總兵謝厥扶隨征總兵鄧震奇監紀同知謝濟水師遊擊韓達戎旗守備韓元龍中軍守備歐國勲鄧駿解送到臣今監錮候

旨

上命之信文到日即將謝厥扶等七犯正法

丙辰

命選便習舟楫者

先是

上命總督阿席熙招募烏船所需舵工水手至是阿席
熙奏舵工水手若于八月內召足隨船解送似
難必得

上諭烏船需用舵工水手最為要緊宜用精熟諳練之
人河南山東湖廣江南江西浙江山西俱有福建投
誠開墾官兵多習水性其行令各該巡撫遴選便于
舟楫者報部其舵工水手仍聽總督阿席熙多方召
募如不能足數即以各省所報官兵酌量發往

丁巳

敕將軍穆占規斷賊後

總督金光祖奏廣西馬逆及孫延齡交戰撫臣

傅宏烈已統兵西行又楚逆方逼韶城與我兵對壘乞多遣滿兵以資勦禦

上諭逆賊吳三桂分遣賊兵侵犯廣東韶州廣西桂林諸處皆由大將軍安親王岳樂將軍穆占等擁兵坐守長沙不即破賊平定湖南所致也岳樂等其以文到日即分兵令穆占率赴樂昌諸處以斷來犯韶州賊兵後路夾而攻之度未可行穆占即會同大將軍簡親王喇布進取衡永諸處以斷侵犯兩粵賊兵後

路其撫蠻滅寇將軍巡撫傅宏烈既統兵赴援廣西
聽其相機堵剿平定地方

癸亥趙尚之信赴韶州

時將軍莽依圖奏臣自省城啟行于七月十四
日抵韶州見城北陸路逆賊掘壕數重與官軍
對壘請發大兵星馳赴援尚之信又奏粵地土
寇尚多潮惠人心未定且高州四府屢報賊警
臣屬官兵不得留鎮省會

上諭令將軍拉哈達賴塔等大兵至潮州劉進忠等俱已歸順海寇敗遁粵境悉平而尚之信又以土寇為辭不離省城則逆賊各路來犯粵東又復可虞不但廣西難復楚賊難滅而廣東勢亦難保尚之信其以文到日即親統官兵速赴韶州與將軍莽依圖等并力却賊

丁卯將軍巡撫傅宏烈奏復梧州

宏烈率官兵進取廣西會偽將軍趙天元等七

人擁衆萬餘據守梧州是月二十六日賊出城
迎戰我兵水陸奮擊敗之斬首無算乘勝遂復
梧州天元等僅率百人棄馬遁

戊辰

命大將軍安親王岳樂遣兵守醴陵

岳樂奏醴陵江楚接壤要地乞

敕簡親王遣無事地方兵每佐領三人駐守

上諭近覽簡親王奏江西大兵調發諸處勦賊防守要

汎兵力既分無可復調將軍穆占自岳州帶往兵令
分每佐領四人留駐長沙聽安親王酌量遣發赴醴
陵防守

甲戌

命署副都統赫埒布等協勦叛賊黃四標

將軍莽依圖奏投誠總兵黃四標逃奔入山又
據始興縣報投誠總兵薛起龍叛變率賊衆四
千屯駐江口擄掠民間子女臣調兵省城今尚

未至韶州官兵又不可動乞調附近之兵以資撲勦

上命駐守南安署副都統赫埒布就近領兵前往會同南雄總兵官宋四箴等協力速滅叛賊黃四標薛起龍等以靖地方

九月丙子

詔增荊州兵

先是

上諭兵部今廣東底定正當破賊之時亟宜添發大兵
平定湖南勦滅逆賊吳三桂頃大將軍公圖海報我
兵已經撤回陝西見有大將軍將軍提督勦賊防汛
自無不足且滿洲大兵又復不少宜分滿兵每佐領
三人并酌選將軍提督所部綠旗兵同京師兵每佐
領三人遣赴湖廣其令圖海會同各將軍提督確議
以聞至是圖海等奏臣等本宜撥滿兵每佐領三人
發往湖廣但陝西幘員遼濶所在防汛今議分

滿兵每佐領二人酌遣三將軍二提督標下綠旗兵三千人同滿洲大兵付大臣一人率赴荊州餘兵分守各隘

上諭前覽大將軍順承郡王奏欲自荊州渡江請發將軍鄂鼐所攜舟師并將軍穆占所部精兵每佐領五人及前鋒兵綠旗兵以資進剿又大將軍貝勒尚善等奏請留將軍鄂鼐每佐領兵五人仍駐岳州仍如前請添發烏船四十艘精兵每佐領四人庶賊船可

破今當秋爽正進兵破賊之時且吳逆現駐湘潭分遣荆岳賊兵侵犯兩粵宜乘逆賊勢分增荆州諸處兵令順承郡王統率渡江鼓行滅賊即勢有未便仍當臨江揚兵以牽制逆賊俟鳥船告竣即將所添官兵發遣貝勒尚善軍前令擊破賊船水陸夾攻岳州大將軍公圖海等速分滿兵每佐領二人委大臣一人速赴荆州其綠旗官兵可減一千止撥二千令原統轄官率往又山西提督周卜世亦令率所轄官兵

同赴湖廣所調山陝綠旗兵其酌予賞賚官各加一級更撥京師兵每佐領護軍二人驍騎一人添發湖廣令公溫齊統之副都統杭奇穆舒為兩翼溫齊杭奇叅贊軍務

命一等侯馬三奇為潮州總兵官

先是大將軍康親王傑書等請以一等侯馬三奇補授平陽總兵官

上允之至是傑書等又奏潮州重地非得材能不可馬

三奇材力驍壯著有戰功且潮州官兵大半馬
得功舊部若以三奇為潮州總兵官則衆心俱
服

上乃授三奇為潮州總兵官其前授總兵官王國棟著
以粵東要地總兵缺補用

命耿精忠仍駐潮州

大將軍康親王傑書等奏言漳泉諸處稍定臣
等隨授都統賴塔平南將軍印選前鋒護軍兵

二千餘暫守潮州其內府佐領兵及喀喇沁土
默特兵令將軍拉哈達率赴會城靖南王下官
兵亦留守潮州令耿精忠但攜其護衛親軍與
拉哈達偕來

上命耿精忠仍駐潮州復

敕諭傑書及尚書介山侍郎吳努春等曰今當勦滅吳
逆招攜拊順之時不宜遽調精忠還會城以疑衆心
王及大臣等不將茲事預請即撤精忠殊為失計嗣

今凡重有關繫若此等事者務熟籌請旨毋得輕忽
癸未調和碩額駙華善等領兵赴江西

大將軍簡親王喇布等奏臣等或進取衡永或
救援韶州必厚增兵力始克有濟乞多撥就近
官兵星馳前至

上諭和碩額駙華善學士薩海率江寧所有盛京兵三
百自京撥往漢軍兵三百徽州駐守滿兵五十蒙古
兵六百速赴江西抵南昌日合多諾等兵多選有馬

者率赴簡親王軍前以聽調遣華善所佩平寇將軍
印留付署副都統科爾擴岱管理江寧事務至安慶
見有撫標兵提督王永譽可量率所部兵往守徽州
已丑總督董衛國奏瀘溪諸賊平

衛國率官兵進勦逆賊朱統錫是月初三日大
敗賊衆于瀘溪諸處擒偽總兵金洪尹文郁及
統錫子議涵姪議漢盡殲餘賊統錫為賊黨執
送閩省地方悉定

乙未

詔責將軍穆占

穆占奏臣等于本月初二日赴袁州察訪進兵道路即赴樂昌如有未便則會合簡親王進取衡永又前議留臣兵每佐領四入于安親王所適兵部遣洛以文到日即分兵赴樂昌用是悉師以往未獲分留長沙

上責之曰穆占不進取樂昌不赴茶陵攸縣徑回袁州

以會同簡親王為辭又自違本議自荆岳所帶官兵
盡攜赴袁不分留長沙殊屬不合穆占其速如前議
分每佐領兵四人留安親王軍前其或進取樂昌或
由茶陵攸縣進取衡永作速定議前進一面奏聞

戊戌

命增造戰艦

先是

上諭議政王等逆賊吳三桂憑江湖之險抗拒大兵為

日已久若不速行剿滅湖南民困無有已時聞逆賊多備鳥船戰艦死拒我師我師亦宜倍製鳥船沙船更令捐助鹽船多載糧米由岳江入洞庭盡占江湖斷賊糧道夾攻岳州如事屬可行應遣賢能大臣官員會同督撫尅期造船多設水師營綠旗兵同大兵齊進期于一舉滅賊但增船破賊事關機要大將軍順承郡王勒爾錦貝勒尚善等身在地方與賊逼近應否舉行著速議以聞至是勒爾錦等議奏若令舟

師入洞庭盡占江湖斷賊糧道即合新舊船艦
亦不數用久泊風濤我船不利若泊于南潯港
一帶非並設陸路重兵則我船不得傍岸勢不
能久占江湖阻賊餉路也但逆賊造船未已長
江關繫最重目前計之造船雖無大益然賊舟
漸增之時我舟又非可驟得預行添造甚屬有
裨烏船沙船可載數月之米其捐助鹽船似應
停止

上命造烏船六十艘沙船二百艘戶部尚書伊桑阿赴江南同該督撫速行督造俟船將告竣更添發綠旗官兵鹽船停其捐助

臣謹按逆賊所以久踞岳州者恃有江湖之險舟艦之衆苟不奪其所恃岳州難以遽拔皇上因多造烏船沙船畢占江湖斷賊餉道誠為制勝要莫而行間諸將猶以風濤可慮不能久泊為辭賴

皇上神謨獨斷特遣大臣尅期督造配兵入湖扼其險
要斷其資糧未幾賊果食盡援絕棄岳州而
潰遁矣由是觀之凡水陸情形攻圍機要無
一不在

聖明睿照之中洵非諸將所能仰窺萬一也

平定三逆方畧卷三十二

欽定四庫全書

平定三逆方畧卷三十三

康熙十六年十月乙巳

命將軍巡撫傅宏烈募兵

時宏烈遣將軍莽依圖書言宏烈僅以兵五千
獨當西路恐力不能支請滿洲將軍一人率騎
兵千餘來至粵西以壯聲勢莽依圖以

聞

上諭傳宏烈進定粵西獨當一路宜以重兵自隨聽宏烈如廣西經制兵額便宜召募汛守新復地方兼勦寇賊又將軍穆占見領兵赴廣東夾勦韶州賊俟穆占抵粵破賊之後與將軍莽依圖等會議作何分兵赴梧接應宏烈聽酌量以行

丙午

命大將軍簡親王喇布遣兵益將軍穆占軍

穆占奏臣在袁州養馬二十五日即赴樂昌因

赴樂昌故不留兵長沙悉以大兵隨行

上諭將軍穆占仍遵前旨速分兵每佐領四人赴安親
王軍前和碩額駙華善兵已全往江西簡親王可於
見駐南昌吉安兵或穆占所經地方兵內分每佐領
三人益穆占軍韶州方有賊警穆占不得久駐袁州
令養馬二十日即馳至樂昌簡親王仍駐江西調度
兵馬勦滅韓大任諸賊

戊申

命送馬至將軍巡撫傅宏烈軍前

宏烈奏臣標兵數萬皆無馬匹一遇寬廣之地賊騎而我步無以取勝祈按數給與

上命總督董衛國撥協解江西馬一千匹俟路通之日委賢能官員解與總督金光祖轉送將軍巡撫傅宏烈軍前未幾又發江西馬一千匹送往

甲寅

命彙集續順公官兵家口駐潮州

大將軍康親王傑書奏續順公為海寇執往臺
灣其官兵家口散處無所屬

上命續順公官兵家口彙為一處令駐潮州以副都統
張夢吉宋文科等統之同將軍賴塔等協守地
方其官兵俸餉令侍郎達都如舊撥給

將軍莽依圖奏敗賊於蓮花山

九月二十四日偽將軍胡國柱馬寶等率賊萬
餘犯韶州渡河東至蓮花山薄江寧大兵營額

楚等率兵拒戰莽依圖等自城中遣兵夾擊破
其四營斬獲甚衆賊大敗遂奔回帽峯山

命統領江寧兵額楚帥師赴梧州

上諭議政王等曰今韶州路通宜速發官兵接應粵西
可移檄將軍莽依圖等分滿兵每佐領三人付統領
江寧兵額楚率赴梧州與將軍巡撫傅宏烈併力剿
禦至兩廣兵餉及馬關係緊要宜速給發以慰軍心
前所撥餉銀已至贛州今遣戶部員外郎莫洛馳驛

赴贛隨都統勒貝兵而行以餉銀送往南雄到日令駐韶州將軍等遣兵迎取轉發兩廣其撥遣馬匹令江西督撫選賢能官押送總督金光祖軍前

命總督金光祖等取南寧諸郡

光祖奏臣已遣標下官兵二千進取梧州又遣

二千赴韶州俟大兵擊敗韶賊之後臣即撤回

官兵率赴高州同總兵官祖澤清直取南寧等

府

上諭韶州賊已為我兵擊敗速行政定廣西正在此時
金光祖可撤回赴韶官兵同祖澤清進取南寧柳州
諸處

賞賚將軍穆占部下官兵

穆占奏

臣

遵部檄分每佐領兵四人付副都統

龔圖於本月初十日赴安親王軍前因部檄不

言留綠旗兵與紅衣礮故

臣

盡率綠旗兵攜紅

衣礮以往

上諭穆占如期養馬畢即速行勦賊其所率綠旗官兵
皆係秦楚勞瘁將士官員可各加一級兵丁支正項
賞賚

丙辰

命都統勒貝領兵赴韶州

將軍覺羅舒恕奏臣閱將軍巡撫傅宏烈來書

云若得滿洲大兵駐守梧州即可親統士馬進
定廣西今韶州賊為我擊敗機誠難得且南安

有滿兵駐守平南親王官兵復守南雄宜及此機會令都統勒貝率所部赴韶州協剿逆賊如此苟宏烈請兵亦可便宜策應

上諭頃令統領江寧兵額楚率滿洲大兵已往援宏烈勒貝兵不必發往廣西但韶州所關甚要儻韶州賊尚未敗遁令勒貝星馳赴韶同將軍莽依圖等協力速滅逆寇

辛酉

命公溫齊以提督周卜世兵同赴荊州

上諭兵部據山西提督周卜世疏稱所部兵千餘人至河南府譁譟僅能撫定爾部速檄公溫齊令其進發之時由河南府挾周卜世兵同赴荊州密為之防

乙丑將軍莽依圖奏韶州賊遁

逆賊胡國柱等為我兵擊敗震懾喪氣於九月二十八日棄帽峯山潛遁莽依圖等即分兵數道躡擊過樂昌遂復仁化縣

命副都統額赫訥領兵赴梧州

將軍莽依圖奏言今韶州無警將軍巡撫傅宏烈兵力單薄若無滿兵難以進勦故每佐領兵三名有半付副都統額赫訥率往協勦

上獎諭之曰逆賊犯韶將軍莽依圖同額楚夾勦既大敗賊衆復行追擊仁化諸縣指顧悉平可為智勇兼擅凡為將帥者統率重兵殲滅賊寇底定疆圉不必一一候從中調度惟應機適變斯乃盡心報効期副

委任之至誠也莽依圖當逆賊甫遁即遣副都統額赫訥等往援傅宏烈深可嘉尚頃已令統領江寧兵額楚赴梧州今既遣額赫訥行即令額赫訥毋稽留肇慶疾赴梧州與傅宏烈同定廣西額楚赫勒布仍留莽依圖軍前

命尚之信發兵赴梧州

上諭議政王等曰將軍莽依圖等所遣大兵尚屬單弱今粵東已定潮州韶州等處亦復無警可令平南王

尚之信多選部下官兵付都統尚之瑛或總兵官王國棟帥赴梧州隨滿洲大兵接應將軍巡撫傅宏烈同定廣西

戊辰

命將軍莽依圖帥師定廣西

莽依圖奏臣欲親提大兵進取廣西廣西既定乘勝即取衡湘但此行務期窮賊根株不得不厚集兵力以往請不拘何地就近分兵以益臣

軍俾不誤進勦

上諭見在韶州莽依圖部下兵每佐領七人外又增統領江寧兵額楚署副都統赫勒布兵每佐領三人近都統勒貝又率每佐領兵二人前往兵數已增於前莽依圖可留勒貝額楚守韶州親統大兵速赴梧州同將軍巡撫傅宏烈平定廣西廣西既定或進取湖南衡湘諸處或徑取貴州斷賊後路聽便宜從事

壬申

命叙福建軍功

上諭兵部康親王既定閩疆應遣官賞賚其隨征官兵亦均有勤勞軍功即與議叙

欽定四庫全書

平定三逆方畧卷三十四

康熙十六年十一月丁丑將軍巡撫傅宏烈奏官

兵復潯州

十月初二日逆賊水陸犯梧州總兵官楊國泰
分遣官兵前後夾擊大敗賊衆乘勝追勦初三
日抵潯州城下連戰凡五晝夜殺賊殆盡遂復

潯州

己卯

命大將軍簡親王喇布遣兵勦逆賊韓大任

時韓大任擁衆踞萬安縣梁口坐塘筆帖式以

聞

上諭逆賊韓大任自寧都敗遁竊踞萬安必且與楚賊
合勢護軍統領哈克三副都統錫山雖已統兵前往
恐兵力尚少簡親王其速調滿漢官兵與哈克三等
并力進勦務期剪滅毋仍前踈縱俾賊得逸入湖南

壬午

命將軍穆占帥師勦韓大任

大將軍簡親王喇布奏言據報韓大任等欲渡河潛遁楚賊來迎非乘其未合預行勦滅不可但護軍統領哈克三等部兵甚少若勦逸賊則無兵以遏楚敵若禦楚敵則追勦逸賊又復無兵今吉安無可調之卒臣等議分將軍穆占兵之半暫守永新安福令其半赴泰和萬安諸處

遏禦賊寇

上諭簡親王喇布自到江西並未建尺寸之功晏坐會城虛糜糧餉迨赴吉安以重兵圍城逆賊韓大任奔逸不能擊滅致大任竊踞寧都雖遣副都統布舒庫等率兵前往究未大創賊衆今大任等自寧都任意竄突延及萬安泰和諸處又不能撲勦反以兵少藉口計喇布所轄滿漢官兵為數不少一韓大任未能勦除任其出入宜即嚴加處分念見在與賊相持姑

俟事平日議罪喇布等既不能撲勦韓逆可令將軍
穆占率兵急赴梁口務速剪滅勿使蔓延尋穆占奏
賊渠韓大任敗遁當時圍賊官兵宜即尾追今
當仍令大將軍簡親王或和碩額駙華善率兵
勦禦頃聞吳三桂遣偽帥三人由永新犯吉安
臣身在地方洞悉情形偽帥來犯非迎擊不可
臣是以率兵前進於本月三日抵永新俟後軍
一至即勦除永新百里外所屯賊寇進取茶陵

上復諭簡親王速調前赴寧都副都統布舒庫提督趙
賴等兵亟滅韓逆將軍穆占身臨賊境必悉情形或
先赴梁口協勦遁寇或已進取茶陵遏禦楚賊即乘
機平定湖南其詳悉籌度無失事宜

甲申

命尚之信進兵廣西

之信奏言臣量留標兵守廣東省城盡率餘兵
赴廣西圖賊

上諭之信躬率所部同將軍莽依圖等平定廣西

戊戌

命大將軍安親王岳樂分兵取湘潭

岳樂奏言

臣前所請紅衣礮及綠旗火器官兵

若以付

臣

即可攻取長沙如無綠旗官兵請調

簡親王率兵來止長沙

臣

親統所部赴岳州仗

皇上威靈得下岳州即同岳州兵由水陸進逼長沙逆

賊必不能支長沙可易破也若不令進取岳州

臣當即取茶陵攸縣平定衡永斷來犯廣東逆賊之路直搗湘潭以殲吳逆

上諭簡親王兵屢經發往韶州兼勦逆賊韓大任綠旗官兵無可調者簡親王鎮守吉安亦不便輕離今將軍穆占奏取茶陵攸縣將軍莽依圖又同將軍巡撫傅宏烈平定廣西大將軍安親王其乘此逆賊震動之時速分官兵摧破楚逆取湘潭諸處

十月丙午

命將軍穆占移師定湖南

穆占奏茶陵攸縣新經恢復臣未敢輕離乞調

副都統龔圖帥往長沙之兵及袁州總兵官趙應奎兵來此戍守臣即遵前

旨赴梁口勦賊

上諭大將軍簡親王已遣護軍統領哈克三副都統錫三署副都統雅哈喇雅秦等先後追勦逸賊韓大任副都統布舒庫提督趙賴等復自寧都躡擊已抵萬

安將軍舒恕又遣署副都統尼雅漢率兵赴梁口計
會勦大兵為數已多簡親王等其并力殺賊務在殄
滅穆占當以恢復茶陵攸縣啓聞安親王而親統大
兵抵定湖南摧破逆賊及將軍莽依圖傅宏烈畧定
廣西之時應機而行已而穆占又奏逆賊吳三桂死
守衡州茶陵相距甚近水陸兼通臣部兵戰守
未足乞調安慶提督王永譽率標下官兵前來
併力

上諭前以徽州要地遣王永譽率兵駐守不便遠調安親王軍前益以副都統龔圖之兵為數頗衆今將軍穆占已復茶陵攸縣將進兵湖南安親王其速遣提督趙國祚盡率所部兵復量加滿兵往守茶陵攸縣俾無誤穆占進勦安親王穆占更宜互為聲援同心協謀以期破賊

癸丑

詔責總督金光祖

光祖請就近調發滿兵星馳赴粵東以為後援
上責之曰進征廣西合計將軍莽依圖平南親王尚之
信將軍巡撫傅宏烈并光祖所轄之兵為數已多光
祖正宜乘此機會効力先驅以贖前罪況傅宏烈當
時未任封疆尚能募兵擊賊直入粵西恢復梧州諸
府鼓勵將弁為國宣力光祖本有總督重寄曾疏請
同總兵官祖澤清取南寧柳州至今無意前進遷延
引日反請濟師以為後援殊屬不合其遵前旨速取

南寧柳州

命大將軍簡親王喇布速調兵勦韓大任

喇布奏護軍統領哈克三啓云欲與賊戰而山路險狹騎兵難騁請調遣綠旗官兵相機勦殺否即分兵守隘斷其餉道賊當可破臣隨令總

督董衛國相戍兵可緩者酌量調遣協力往勦上諭護軍統領哈克三副都統布舒庫錫三雅秦提督趙賴等所統官兵頗多且將軍穆占擊敗楚賊收復

茶陵攸縣逆賊韓大任已無外援宜乘此時即行蕩
掃乃稱山路險狹騎兵難用欲調兵守隘延引時日
使賊復得間固守殊悞機宜簡親王量調附近官兵
并嚴檄哈克三等乘賊勢蹙亟行勦滅未幾大任遁
入興國寶石若將軍舒恕以

聞

上諭簡親王前擁重兵圍韓大任于吉安未能殲滅致
令遁出迨大任竊踞梁口而護軍統領哈克三副都

統布舒庫提督趙賴等又不能撲勦復使奔竄簡親王其嚴檄哈克三等并力窮追務在剪除若縱賊入楚從重治罪總督董衛國亦宜統兵協力進勦

甲寅

命尚之信等協取宜章郴州

將軍穆占奏賊帥馬寶率衆赴衡州又賊二千餘屯據宜章

上諭今賊盡赴衡州宜及此時令粵東官兵就近由樂

昌取宜章郴州則逆賊自難持久平南親王尚之信
不必赴梧即速趨韶州同都統勒貝及統領江寧兵
額楚進取宜柳兼定永州

丁巳

命統領江寧兵額楚專奏軍務

上諭兵部廣東韶州地屬緊要一切軍務額楚若啓簡
親王轉奏慮多遲悞其令額楚以江寧將軍卽統轄
兵馬都統勒貝參贊軍務凡事許得專奏

乙丑

命總督董衛國赴吉安

衛國奏江西省城已有副都統多諾鎮守請身

赴吉安會同大將軍簡親王商酌勦禦機宜

上命衛國親率標兵赴吉安與大將軍簡親王共圖勦滅逆賊綠旗官兵聽其便宜調遣滿洲將軍毋得干預

命將軍巡撫傅宏烈等定平樂桂林諸郡

宏烈奏吳三桂偽總統馬寶取道宜章來犯前
隊已抵富川祈更發一軍以為後繼或令韶州
大兵奪取宜章郴州隘口臣同將軍莽依圖進
取平樂桂林則逆賊不能兼顧湖南可立下矣
上諭頃命平南親王尚之信將軍額楚都統勒貝等已
統大兵速平宜柳諸處將軍巡撫傅宏烈可同莽依
圖急定平樂桂林諸郡

庚午

命撤浙江福建蒙古兵

上諭兵部福建已定見駐浙江福建蒙古兵俱宜撤還
康親王可遣滿洲副都統一人同台吉塔布囊率之
還京師

平定三逆方畧卷三十四